

Ulteriura incarica pil plazzal a Sedrun

La decisiun digl AlpTransit ei da grond avantatg fiscal per la vischnaunca da Tujetsch

DA HANS HUONDER / ANR

■ **Bunas novas per la vischnaunca da Tujetsch. Il cussegl d'administraziun digl AlpTransit ha numnadamein decidiu da cavar in ulteriur tschancun da 1,5 km per il tunnel da basa dil Gottard dil plazzal da Sedrun anora enviers sid. Aschia vegnan las lavurs da scavament a cuzzar cheu silmeins entochen la fin 2010. Quei porta buca mo lavur, mobein era ulteriuras entradas da taglia en cassa communal.** Oriundamein era ei previu da cavar da Sedrun anora en tut 9,145 kilometers enviers sid, respectivamein nord. Gia avon rondus onns ha igl AlpTransit allura nezegiau ina emprema opziun e prolungiu il scavament en direcziun Faido per in kilometer. Quella prolungaziun ha giu per consequenza che la vischnaunca da Tujetsch ha stuiu metter a disposiziun ulteriur spazi da deponia per material. Quei ha ella fatg el contuorn dalla Val Bugnei. Plinavon ha ella reservau in ulteriur spazi sut Surrein e tenor basegns era a Dieni.

Aunc dapli lavur

Dacuort ei il cussegl d'administraziun ussa sedecidiu da surschar al plazzal a Sedrun in ulteriur tschancun da scavament, numnadamein in tal da 1,5 km. Quei ei succediu era en stretg contact cun la vischnaunca e las cuminonzas da

lavor pertuccadas. «Ultra da quei tschancun ha igl AlpTransit aunc in'opziun per ulteriurs 1,5 km», di il president da vischnaunca *Pancrazi Berther*. Schebein quell'opziun vegn era nezegiada, dependa dallas circumstanzias da lavur el fiep dalla Piora. La decisiun pro ni contra vegn a curdar probablamein entochen la fin digl onn. Aschilunsch che quella opziun vegn era aunc nezegiada, s'augmenta il tschancun cavau da Sedrun anora da 9,145 sin totalmeins 13,145 km, pia varga ina tiarza dapli che previu all'entschatta dallas lavurs. Lu cavassan ils luvrers da Sedrun entochen el contuorn sut il mir da fermada dil lag da S. Maria. Ils miniers da Faido e Sedrun vegnan a s'entupar el tunnel cavau probablamein miez digl onn 2010. Lu quantan ins numnadamein cun la perforaziun. Gest tenor situaziun sa quella denton era succeder avon ni pli tard. Fussen las opziuns per ina prolungaziun dil scavament da Sedrun anora buca succedidas, massen las lavurs da scavament per il plazzal da Sedrun a fin uonn. La perforaziun dalla vart dil nord ei succedida ils 17 d'october 2007.

Ina situaziun legrevla

Per saver deponer tut il material da scavament metta la vischnaunca da Tujetsch a disposiziun agl AlpTransit ulteriur spazi da deponia. «Nus quintein en sesez che las deponias da Bugnei e Bugnei ost pos-

sien satisfar allas pretensiuns. Sche quei vess buca dad esser il cass savein nus aunc arver la deponia a Claus Surrein. Quella vegn denton en funcziun mo sch'igl AlpTransit fa diever dalla davosa opziun dad 1,5 km», puntuescha *Pancrazi Berther*. El mender cass sa ina part dil material era vegnir deponida a Dieni ed aschia survir all'engrondaziun dils parcadis dallas pendicularas. In'avertura dalla deponia Claus Surrein – che vegn en damonda per sco davosa soluziun – havess per consequenza ch'igl AlpTransit stuess far grondas investiziuns ella colligiaziun. «Il plazzal a Sedrun ei aschia ni aschia gia il car da tuts, il tempo per saver realisar il tunnel ei denton da gronda muntada», di il president communal. Quella prolungaziun dil tschancun da scavament che pertucca ils 600 luvrers dallas cuminonzas da lavur staziunai il mument en Val Tujetsch porta gronds avantatgs alla vischnaunca sezza, essend ch'ei vegn luvrau cheu silmeins in onn e miez dapli: «Nus registrein rodund dus milliuns francs entradas directas da taglia mintg'onn entras igl AlpTransit. Vidlunder vegnan ils avantatgs indirects, per exempel tals en favur dil commerci. Quei ei naturalmeins in legrevel fatg, tonpli ch'els disturbis entras quellas activitads ein minimis.» Las autoritads dalla vischnaunca da Tujetsch han luvrau intensivamein vid bunas soluziuns en favur digl AlpTransit, quei che sepaga ussa.



Il president communal *Pancrazi Berther* ei incantaus dalla decisiun digl AlpTransit da cavar in ulteriur tschancun dil tunnel da basa dil plazzal da Sedrun anora enviers sid. Quei porta alla vischnaunca ulteriuras entradas.

FOTO H. HUONDER

Kino Open Air cun Bruno Cathomas

Arranschament cultural dalla Pro Sagogn e dil Club da film Glion

■ (mc) **Gia per la 10avla gada organischan la Pro Sagogn ed il Club da film questa stad il Kino Open Air. El center da quei event cultural stattan uonn ils films «Chicken Mexicaine» cugi actur indigen Bruno Cathomas ed il film da cult «Hair» che lai reviver l'epoca burasclusa dalla generaziun dils 1968.** Il vitg e la planira da Sagogn che vegn era numnaus il curtgin dalla Foppa seprenta sco ina idilla alla risteina dalla Ruinaulta e cun vesta viers il Rein e viers il Péz Mundaun. Actualmeins vegn quella idilla cumpletada dalla plazza da golf Schluein Sagogn che vegn aviarta questa stad. Ton per indigens sco per hosps da vacanzas munta quella avertura ina «revoluziun migeivla» cun «effects pregnants» sil svilup economic, scrivon ils organisaturs el cudisched da program targend aschia ina parallela culs onns dalla revoluziun da giuventetgna dils 1968.

Avertura cun Bruno Cathomas

Il Kino Open Air a Sagogn che ha liug ils 18/19 da fenadur silla piazza da scola a Sagogn vegn introducuis il vendergis sera cul film «Chicken Mexicaine» che vegn mussaus dil Club da film da Glion. Dalla partida all'avertura ei igl actur *Bruno Cathomas*, igl actur principal dil film *Chicken Mexicaine*. Bruno Cathomas ha fatg sias empremas experienzias sin tribuna culla gruppa da teater locala, la Cumpignia da teater da Laax. Cul giug el liber «Romeo e Giulietta» ha el mess 1988 il crap da cantun per ina carriera remarcabla sco actur caracteristic. Avon exact vegn onns ha Bruno Cathomas aschia fatg il pass dalla tribuna laica al teater professional. Gia 1987 haveva el denton giugau ina rolla el film «Jenatsch» da Daniel Schmid. Suenter igl emprendissadi da stagner ei Bruno Cathomas ch'ei naschius 1965 a Laax s'inscret alla Academia da teater a Turitg. Dapi 1992 seprenta el adina puspei en rollas principalas sin las pli impurtontas tribunas a Berlin, Minca, Basilea, Salzburg e Graz.



Bruno Cathomas – in hosp prominent al Kino Open Air a Sagogn.

FOTO P. DE JONG

Sco el sincerescha seigien inscenaziuns contemporanas da Shakespeare, Goethe, Büchner ed Ibsen per el adina puspei ina gronda sfida. Sper sia lavur da teater cooperescha Bruno Cathomas adina puspei en differentas produziuns da kino ni televisium sco *Tatort*, *Viehjud Levi*, *Canzun Alpina* e buc il davos en *Chicken Mexicaine*. Oz s'auda Bruno Cathomas che viva a Berlin denter ils acturs professionals ils pli etablil sillas tribunas tudesgas. Sco quei ch'el ha tradiu a La Quotidiana viseta el adina puspei sch'els terminis lubeschans ses confamiliars a Laax, siu bab *Othmar* e ses dus frars *Roman* e *Rico* cun famiglias. Era cun ses anteriurs camerats dalla cumpignia da teater ha Cathomas buns contacts. Als Gis da film

da quest onn a Solothurn ei Bruno Cathomas vegnius distinguui cul premi pil meglier actur svizzer che munta la pli aulta distincziun ella scena da film svizzer.

Era Luis Coray ei dalla partida

Dalla partida ei era il musicist *Luis Coray*, medemamein oriunds da Laax che ha procurau cun sias legendaras «Sendas oranschas» per la musica dil tetel *Chicken Nuggets*. Igl actual menader dalla Scola d'art per affons e juvenils a Cuera ha studegiu historia d'art alla Universitad da Turitg, silsuenter terapia da musica e la finala logopedia cun diplom alla Universitad da Friburg. Dapi onns ei Luis Coray engaschus sco logoped e te-

rapeut da musica. Il pedagog ei denton era engaschus sco artist, performer, formader e casarin. Sco cantatur e solist fa Luis Coray era part dil chor da jazz arcas syncopics a Cuera. A Sagogn vegn el a delectar musicalmeins il publicum il vendergis sera avon ch'il film *Chicken Mexicain* vegn mussaus.

Schar reviver ils onns 68

La sonda sera ei dedicata al film «Hair» che ei vegnius realisau 1977 ed ei in film da cult che lai reviver ils onns burasclus da 68. Ina nova generaziun ha fatg rebelliun encunter estructuras petrificadas en stadi, Baselia e societad, rut tabus propagond la carezia libra e la sexualitad aviarta, denton era propagau la pasch en ina societad traumatizada dalla uia dil Vietnam e dalla uia freida denter ost e vest. La musica da rock ed il film *Hair* dil regissur *Milos Formann* han introduciu ina nova epoca. Numerus juvenils e milliuns d'aspectaturs ein seschai incantar ed inspirar da quei temps dalla unda dils hippis e dils cavelis liungs. El film *Hair* giogan *Treat Williams* e *John Savage* las rollas principalas en quei film dils «rebels cun cor».

Affons tardivs dils onns 68 ein probabel era ils cantauturs *Alexi* e *Marcus* cun lur canzuns che reflecteschan «legria e tristezza, amur e gretta, malenconia e protesta» sco ei stat scret el program. En scadin cass ein els davantai il simbol dil protest tgeu e pascheivel ed aschia magari muentau dapli ella societad che cun violenza e ragazza. Sco «revoluzzers pascheivels» hagian ils cantauturs *Alexi* e *Marcus* parallels evidentas culs protagonistas dil film *Hair*. Els vegnan a dar in schatg da lur vast repertori e cunzun dil niev disc compact «Salischina» avon la presentaziun dil film «Hair».

En cass da malauna han las presentaziuns da film liug en halla plurivalenta. Suenter la presentaziun ei la bar aviarta, aschia ch'il publicum sa schar reviver las regurdientschas davart ils onns selvadis dils 68.

Dis da musica Valendau

■ (lq) **Dils 13 tochen ils 20 da fenadur han ils dis da musica Valendau liug sut la bitgetta dil cumponist e dirigent *Thüring Bräm*.** Il chor da combra «Camerata vocale» sescuntra cun il cello-ensembla «I Canticelli» sco era cun l'enconuscenta mezzosopranista *Magali Schwartz*.

Denter ils onns 1987 e 2006 ei il dirigent *Thüring Bräm* staus directur dil conservatori e rector dalla fundaziun dalla scol'aula da musica a Lucerna.

Tier il «Camerata vocale» setracta ei d'in chor da laics cun experientscha che sefatschentan la jamna datada cun in repertori special.

Il «Canticelli» ei ina formaziun professiunala da cellos ch'ei vegnida fundada da *Monika Haselbach* e da *Jürg Eichenberger* e ch'exista ord in'occupaziun variabla da 2 tochen 8 cellos ed ord ina cumbinaziun da clavazin.

La mezzosopranista *Magali Schwartz* ha studegiu musica en il conservatori a Losanna ed ei duront ils davos onns stada engaschada per produziuns d'operas e per musica contemporana.

Ils concerts han liug:
Plaz dil vitg Valendau, ils 16 da fenadur, 20.30
Baselgia a Valendau, ils 18 da fenadur, 20.45
Baselgia a Waltensburg/Vuorz, ils 19 da fenadur, 20.45
Baselgia a Val, ils 20 da fenadur, 17.00

■ BREIL

Exposiziun d'art sil camp da golf

(lq) **In camp da golf porscha spazi per se-revegnir, per s'occupar culla natira e cun sesez ed el animescha era da ponderar.** Da quels e semeglions patratgs han menau *Flavio Tamagni*, il senior capitani dil Club da golf Breil, sill'idea da cumpletar ed enrihir il spazi d'eventiment dil camp da golf cun in'exposiziun d'art. Amittgs dil golf sco era hosps han la pussevilladad da contemplar las sculpturas dils siat artists entochen ils 4 d'october. Persunas che dattan buca golf san s'annunziar per in guid tier il secretariat da golf sut 081 920 12 12 ni tiel Center turistic Breil sut 081 941 13 31. Ils guids han mintgamai liug il venderdis allas 13.00.